

Buk blong Kandidet

Ripablik blong Vanuatu, 2021



Wanem i stap insaed

Introduksen. Wanem i stap insaed long buk ia4

Mesej i kam long Jeman blong EC5

Pat 1. Eleksen blong Vanuatu: wanem lo i talem6

1.	Eleksen long Vanuatu: introduksen	7
2.	Stamba blong lo blong eleksen	8
2.1	Konstitusen	8
2.2	Lo mo regulesen blong elektorol saed	9
3.	Elektorol fasin	10
4.	Ol bos blong elektorol saed	11
4.1	Elektorol Komisen (EC)	11
4.2	Vanuatu Elektorol Ofis (VEO)	12

Pat 2. Elektorol operesen, Ofens mo fasin blong fiksemup ol problem14

5.	Rejistresen blong ol man we oli vot	15
5.1	Huia ol man we oli save rejista mo vot	15
5.2	We ples mo wanem fasin blong rejista	16
6.	Fasin blong wok insaed blong vot ofis mo fasin blong kaontem ol vot	17
6.1	Poling (taem blong vot) operesen	18
6.2	Kaonting operesen (taem oli kaontem ol vot)	24
7.	Taem oli ademup vot mo talemaot long ol man	25
8.	Elektorol ofens	26
9.	Ol man we oli no agri, man we i gat komplem mo ol petisen	28
9.1	Ol risen blong man ino save vot	29
9.2	Ol komplem akensem ol man blong rejistri ofis	29
9.3	Ol elektorol petisen	30

Pat 3. Stanap olsem wan kendidet..... 31

10.	Stanap olsem wan kendidet: wan introduksen	32
10.1	Ol lesen blong stanap olsem kendidet	34
10.2	Redi blong stanap	35
11.	Stanap: ol woman kendidet	36
11.1	Ripresentesen blong ol woman: hemi impoten tumas	36
11.2	Ol jalenj ol woman kendidet bae oli save fasem	38
11.3	Yu mas sowem se yu kwalifae mo yu gad gud fasin	38
12.	Elijibiliti (spos hemi gat raet o no) blong kendidet	40
12.1	Elijibiliti blong stanap long Nasonol Plemen	40
12.2	Elijibiliti blong stanap long Provinsol Kaonsil	41
12.3	Elijibiliti blong stanap long Munisipol Kaonsil	
13.	Fasin blong nominesen (taem oli putum nem blong kendidet long stanap)	42
13.1	Rod mo fasin blong nominesen long Nasonol Eleksen	43
13.2	Rod mo fasin blong nominesen long Provinsol Eleksen	44
13.3	Rod mo fasin blong nominesen long Munisipol Eleksen	46
14.	Gudfala fasen ol pati mo kendidet oli mas folem	47
15.	Elektorol kampen (fasin blong talemaot long ol man from wanem yu stanap)	48

Pat 4. Kendidet mo ol ajen blong pati (ol representativ) 52

16.	Wok mo impotens blong kendidet mo ol pati ajen	53
17.	Ol raet mo risponsibiliti blong kendidet mo ol pati ajen	54
18.	Akreditesen (ol man we oli karem raet) blong kendidet mo pati ajen	56
19.	Gudfala fasin we ol kendidet mo ol pati ajen oli mas folem	57



Yu stap tingbaot blong stanap olsem wan kandidat?

I gud. Bae yu nidim blong save gud lo mo wok mo risponsibiliti (wok) blong yu. Buk ia hemi blong givim long yu mo ol man we oli gat intres blong stanap long eleksen long Vanuatu wan jans blong save gud elektorol fasin.

Introduksen. Abaot buk ia

Elektorol Komisen (EC) blong Vanuatu i mekem buk ia. Hemi otoriti we hemi lukaotem elektorol registri mo lukluk long eleksen insaed blong kaontri. Hemi long ol man we oli wantem stanap olsem kandidat, long nasonol, provinsol mo miunisipol level.

I gat ol lo we i pass long Palemien blong lukaotem eleksen blong Vanuatu mo yu mas save wanem ol lo ia. EC i tingting se bae i save helpem ol kandidat spos oli gat buk ia blong oli save gud ol ruls mo ol fasin blong stanap long eleksen. Yumi sowem tu long buk ia ol spesol fasin blong stanap long eleksen.

I gat fulap man oli gat eksperiens finis long stanap long ol eleksen. Sam man oli save finis wanem i stap insaed long buk ia. Be spos you save ridim buk ia bakegen blong tingbaot bakegen ol gudfala fasin blong folem blong stanap long eleksen.

I gat ol niufala kandidat we oli nidim help mo infomesen tu. Buk ia i talem ol difren rod long elektorol fasin long ol niufala mo olfala kandidat blong tijim gud long olgeta ol rod mo fasin blong eleksen. Bae yu save lanem saed blong lo tu insaed long buk ia.

Buk ia i talemaot gud ol fasin mo rod ol kandidat oli mas folem blong mekem se ol nem blong olegta i stap insaed long ples blong vot. Hemi eksplenem gud fasin blong kandidat blong oli save jekem rod blong eleksen. Buk ia i talemaot gud rod mo fasin yu mas folem blong yu kam wan kandidat.

Buk ia hemi wan sot buk nomo. Hemi no wan legol pepa mo hemi no wan lo . Spos yu wantem jekem lo, you go long Ripresentesen long Pipol Ak 1982, mo ol narafa lo long saed blong eleksen.



Ol kandidat mo ol political pati oli stamba blong eleksen. Blong mekem se eleksen hemi gud mo ol man oli save beliv long hem, i mas gat rispek long fasin mo rod blong folem. Elektorol autoriti oli givim legol stamba mo fasin blong folem. Ol kandidat oli mas rispektem ol rul blong lo mo ol man we oli stap wok insaed. Kandidet mo ol politikol pati bae oli mas rispektem ol ruls long fasin blong eleksen.



Welkam long “okay, you wantem stanap olsem wan kandidat”. Elektorol Komisen blong Vanuatu i mekem buk ia blong ol man we oli wantem stanap long eleksen blong nasonol palem, provinsol mo miunisipol eleksen. Elektorol Komisen blong Vanuatu hemi glad tumas blong sowem buk ia long ol kandidat. Oli mekem blong tijim yu saed blong lo we i sowem rod mo fasin blong folem long eleksen. Infomesen ia bae hemi gud long eni man i wantem stanap. Spos yu wan man we yu stanap finis long eleksen bifo o hemi fas taem blong yu blong stanap, buk ia hemi blong yu.

Spos yu stap tingbaot long ol eleksen blong Vanuatu bae yu nidim blong harem save gud ol legol fasin we yu mas folem, rol mo risponsibiliti blong yu, long saed blong lo. Tingbaot, yu wetem ol supota blong yu, bae yufala i save mekem se everi vot long wanwan man bae hemi impoten tumas. Bae i gat fulap samting i hapen taem you disaed se bae yu kam wan kandidat, taem nominesen blong yu i apruv mo taem long dei blong vot i kam. Buk ia oli mekem blong helpem yu blong prepea long eleksen.

Ol politikol parti mo kandidat oli stamba blong eleksen. Spos yu wantem stanap, i gat stret rod blong folem wetem ol lo we oli stamba blong eleksen. Buk ia hemi blong ol kandidat blong wan politikol pati o ol independent kandidat. Hemi sowem gudfala rod blong folem blong stanap strong long eria blong yu. Buk ia bae hemi helpem ol woman kandidat blong folem stret rod blong mekem kampen blong olgeta mo karem nominesen no mata i gat ol bigfala obstokol. Nominesen blong ol woman bae oli gud long komiuniti blong olgeta mo long Vanuatu.

Elektorol Komisen i talem welkam long evri man i wantem stanap olsem kandidat mo i wijim “gudlak” long evriman. Sem taem, Komisen i wantem mekem sua se ol kandidat oli gat ol infomesen long saed blong stamba blong lo blong folem wan gudfala rod long ples ia mo internesoneli.

Long ol Eleksen ol man, speseli ol kandidat mo ol politikol pati, oli mas folem wan stret rod mo folem gud ol lo mo ol ruls. Buk ia bae i helpem ol kandidat blong folem stret rod. Long Vanuatu, yumi nidim hemia, naoia, no mata huia bae i win!



Martin Tete
Jeman, Elektorol Komisen

Pat 1: Eleksen long Vanuatu. Stamba blong instutisen mo lo blong eleksen.



Ripublik blong Vanuatu i karem independens long 30 Julae 1980 mo hemi karem palementeri fasin blong politik semak olsem Westminster (long Inglan).

Stat long taem ia, kantri i gat ol eleksen we oli folem stret rod wetem ol stret risul.



1. Eleksen blong Vanuatu: Wan introduksen

Folem ol narafala ples long wol, ol sitisen blong Vanuatu oli gat ol man we i ripresentem olgeta long Palemen. Ol man ia oli mas rimemba se oli wok blong helpem ol man blong kantri mo oli jud wok blong helpem ol man mo ol sitisen blong kantri.



Eleksen long Vanuatu i minim nasonol, provinsol mo miunisipol eleksen blong elektem Nasonol Palemen, Provinsol Kansil mo Miunisipol Asembli. Semtaem I gat 22 memba long Malvatumauri we hemi Nasonol Kansil blong Jif. Wok blong hem hemi blong advaesem long saed blong Melanesien fasin, kastom mo tradisen.

Lo i talem se i save gat Nasonol Referendum (evri sitisen blong kantri oli vot blong talem tingting blong olgeta) blong jenjem konstitusen be kasem tedei ino bin gat wan Referendum.

Vanuatu i gat Palemen wetem 52 memba mo wan jemba nomo (wan grup nomo) we oli elektem olgeta long fasin blong multi memba mo singol memba. Long tufala kes, ol kandidat oli stanap blong karem wan jea insaed Palemen blong ripresentem konstituensi blong olgeta.

Ol man oli vot long wan kandidat nomo. Man i karem fulap vot pitim ol narawan bae hemi karem jea insaed Palemen.

I gat 18 Nasonol Konstituensi, i gat siks (6) long singol memba mo 12 long mutipol memba (2 kasem 7 memba).

I gat eleksen insaed long siks (6) provins blong elektem ol provinsol asembli (lokol gavman kansil). Bakegen ol asembli ia oli elektem olgeta long wan fasin blong singol memba o mutipol memba konstituensi (namba blong konstituensi hemi folem fasin we i stap insaed long provins) folem fasin blong Nasonol Palemen eleksen.

I gat Miunisipol eleksen long tufala uban senta blong kantri, Port-Vila mo Luganville. Ol eleksen i hapen long fo ples insaed blong ij konstituensi (ol mutipol memba).

Oli gat eleksen long taem blong olgeta. I gat ol Nasonol, palementeri mo provinsol eleksen evri fo ia. Presiden bae i jusum deit blong eleksen folem advaes blong Praem Minista, EC mo Prinsipol Elektorol Ofisa (PO).

2. Stamba blong lo blong elektorol fasin



Ol eleksen oli wan politikol res (o ran) we i gat stret stamba blong hem. Long ol narafala kantri ol ruls ia oli stap insaed long ol legol dokumen, stat wetem ruls blong Konstituen, elektorol lo mo ol regulesen we elektorol autoriti oli mekem. Olgeta ia oli stamba blong lo blong kantri.

Legol stamba blong ol eleksen blong Vanuatu hemi Konstitusen blong Ripablik blong Vanuatu (1980), Ripresentesen blong ol Pipol Ak (1982), ol Munisipol Ak (1980) Lokol Gavman Eleksen ruls (fasin) (1982) Disentrelaesesen Ak (givim mo pawa long ol lokol gavman) (1994) mo ol amendmen (ol jenj), Nasonol Referendum Ak (2004) mo ol amendmen blong hem. I gat tu ol narafala lo we oli lukaotem ol eleksen long kantri, inkludim ol Eleksen blong Presiden Ak, Nasonol Jif Ak mo Referendum Ak.

2.1 Konstitusen

Konstitusen we oli saenem long 5 Oktoba 1979 i lukaotem ol samting blong demokrasi, ol institusen mo ol eleksen. Konstitusen blong 1980 i lukaotem gud ol stamba raet mo fridom, fridom blong toktok, miting mo asosen, mo fridom blong stanap long eleksen. Konstitusen i gat ol ruls blong hem long saed blong eleksen mo kampen.

Ol atikol (ol toktok insaed blong konstitusen) i talem se vot hemi univesol

(long ol man) ekwol mo sekret; Ol man oli save vot taem oli kasem 18 spos ino gat wan tabu tok i kam long Palemen; ol man oli save mekem ol politikol pati blong olgeta mo oli gat raet blong stanap long eleksen.

Atikol 17 i tokbaot eleksen blong ol memba blong Palemen we ol man oli elektem olgeta (evriman i gat raet blong vot – oli singaotem “univesol franjas”)

Stamba tingting blong mekem stamba lo blong eleksen i mas stap long wan fasin we ol man oli save harem save mo ino gat wan rabis fasin long hem. I mas gat ol rod blong mekem se eleksen i hapen long wan stret fasin. Ol man oli jud harem save gud, oli mas save wanem rod blong folem mo i mas folem tingting blong ol narafala lo blong mekem se ol man oli mas rispektem lo ia.



2.2 Elektorol lo mo regulesen blong hem

Repretensen blong ol Pipol Ak (RPA) hemi elektorol stamba lo blong kantri, we oli apruvum long 1982 mo jenjem lelbet kasem tedei. Ak ia (lo ia) mo ol amendmen blong hem i talemaot ol stamba ruls long saed blong eleksen m oi gat ol smol smol pepa (jediul) we i givim ol detel blong eleksen. Jediul (ol narafala smol jenj) i givim ol infomesen long saed blong ol elektorol autoriti (ol ofisa) mo stret wok blong olgeta mo fasin long saed blong rejestresen mo fasin blong elektem ol mamba blong Palemén.

Konstitusen i talemaot long wan stret fasin wok blong gavman mo long ol provinsol gavman. Stamba lo blong ol provinsol eleksen (blong elektem “ol lokol gavman kansil”) i stap insaed blong Konstitusen,

long ol Miunisipaliti Ak, ol Ruls blong Eleksen blong Lokol Gavman blong 1982 mo ol jenj blong hem mo Ak blong Disentrelaesesen (givim moa pawa long ol lokol kansil) blong 1994 mo ol jenj insaed blong hem.

Referendum Ak blong 2004 mo ol jenj blong hem (Amendmen) i gat ol stamba lo blong mekem wan Nasonol Referendum.

Spos ol man oli vot pitim 50 % long Referendum long saed blong wan jenj long wan Konstitusonol amendmen (jenj), taem ia oli apruvum.

Antap blong elektorol lo, i gat ol narafala ruls, regulesen mo ol prosidia (fasin) we EC mo VEO i mekem.

3. Elektorol Fasin (sistem)



I gat fulap fasin blong folem blong stanap long eleksen blong Nasonol Plemen, provinsol mo miunisipol asembli. Oli save gat wan singol memba nomo o fulap memba blong eleksen o tufala semtaem. Olgeta ia oli mekem “elektorol sistem (fasin). I gat ol stret rod blong lukluk huia i win tu.

Konstitusen blong Vanuatu i askem se elektorol sistem (fasin) hemi inkludim (putum insaed tu) wan ripresentesen blong evri difdifren politikal pati mo ol grup blong mekem se hemi stret long evriwan.

I gat ol elektorol system (fasin) oli yusum: a) spos hemi wan singol memba konstituensi (wan sit nomo blong konstituensi) oli yusum fasin blong Fas Man we i Pasem Post (FPTP). I minim se man we i karem fulap vot pitim ol narafala man, bae i kasem sit. B) Spos hemi multipol-memba konstituensi, oli yusum Singol Non-Transferobol Vot (SNTV). I minim se spos i gat 4 sits long konstituensi ia, ol 4 man we oli kasem fulap vot pitim ol narafala man, olgeta nao bae oli karem sit.

Fasin ia (FPTP) long wan singol-memba konstituensi mo SNTV hemi rod blong folem long Nasonol, Provinsol mo miunisipol eleksen (ol konstituensi long miunisipol eleksen oli multi-memba sit (i save gat moa than wan memba). Hemia fasin blong Miunisipol elksen. Oli putum ol spesol fasin long eleksen blong miunisipol eleksen blong mekem se ol woman tu oli save kasem sit. I gat 30 % long Port-Vila mo Luganville.

Folem rod blong FPTP mo SNTV, man i save vot wan taem nomo.

4. Elektorol Otoriti (ol bos)

Stamba blong lo long Vanuatu long saed blong eleksen i gat wan independen manajmen komisen; i gat tu (2) komisen: Elektorol Komisen (EC); hemi mekem ol polisi, hemi supevaesem ol eleksen. Afta i gat Vanuatu Elektorol Ofis (VEO) we i wok wetem Elektorol Manajmen mo i mekem wok long saed blong eleksen.

4.1 Elektorol Komisen

Insaed blong Japta 4 blong Konstitusen i gat Elektorol Komisen (EC) we hemi impoten tumas long saed blong eleksen pitim ol narafala komisen. Insaed i gat Jeman wetem tu narafala memba we President i apointem olgeta long 5 ia wetem advaes blong Judisiol Sevis Komisen (JSC).

EC hemi responsibol blong rejistresen blong ol vota mo fasin blong Eleksen blong Palemen, provinsol mo miunisipol. Hemi supevaesem tu eleksen blong Malvatumauri. EC hemi risponsibol blong Nasonol Referendum mo blong eleksen blong Presiden.

Atikol 20 blong Konstitusen i talemaot gud ol pawa mo wok blong EC blong hemi supevaesem ol rejistresen mo ol narafala eleksen long Kantri; hemi talemaot long ol man huia i win long eleksen; hemi talemaot ol risul blong eleksen; hemi lukaotem edukasen blong informesen blong ol man i vot (vota); hemi givim ol advaes long Minista blong Internal Affairs mo long Gavman, Palemen mo ol narafala dipatmen mo ajensi; hemi mekem

ol risej (lukluk insaed) taem i gat problem insaed blong eleksen. EC hemi gat raet blong adoptem ol regulesen folem atikol insaed blong Konstitusen mo ol narafala lo long saed blong eleksen.

EC i gat raet blong putum tabu long wan desisen i kam long Prinsipol Elektorol Ofisa (PEO); hemi save sakemaot apil blong vota long saed blong rejistresen blong hem; hemi save talem se wan kandidat hemi elektet mo hemi no gat oposisen; hemi save talem se wan vot hemi nogud long taem blong kaontem ol vot; hemi save talem se bae oli kaontem ol vot bageken spos i gat problem wetem ol risul mo spos i gat apil; hemi save talem se wan memba hemi elektet long Palemen; hemi save mekem ol oda long saed blong fasin blong ol vota mo long eleksen.

Elektorol Komisen i gat asistens (help) long Eksekutiv Secreteria, nem blong hem Vanuatu Elektorol Ofis (VEO) we bos blong hem hemi Prinsipol Elektorol Ofisa (PEO)



4.2 Vanuatu Elektorol Ofis (VEO)

Vanuatu Elektorol Ofis (VEO) hemi han blong Elektorol Komisen (EC) we i mekem wok blong administresen blong eleksen. Konstitusen i talem se i mas gat wan Prinsipol Elektorol Ofisa (PEO) blong hemi hed (bos) blong VEO. Naoia i gat wan depiuti PEO wetem 15 narafala staf mo 6 provinsol Elektorol ofis.

VEO hemi stap long Port-Vila. Hemi stap stanemap ol representesen long long ol aelan mo ol provins wetem ol permenen elektorol ofis moo li stanemap tu ol elektorol ofisa blong mekem trening long ol rod mo fasin blong eleksen. Ol temporeri staf (ol man i wok) oli preparem mo stanap ol eleksen long ol provins. Lo i talem se PEO hemi jud apointem ol "rejistresen ofisa" (RO's) long ol elektorol konstituensi. Stamba wok blong RO's hemi blong kolektem mo givimaot long ol man, ol pepa blong eleksen we i kam long presaedin ofisa mo tu, hemi mas lukatoem elektorol eleksen long eria blong hem. RO's oli rikruitem (karem blong wok) mo eksplenem gud wok long ol "ritunin ofisa" we oli wok olsem presaedin ofisa insaed long ol poling stesen (ples blong vot), wetem ol staf blong olgeta.

PEO hemi manajem VEO mo bos blong hem hemi EC (Elektorol Komisen) long saed blong wok blong hem. Ak (Elektorol lo) blong Ripresentesen blong ol Pipol i talem gud wanem wok blong PEO. Lo i talem PEO i gat risponsibiliti blong lukaotem administresen blong fasin blong eleksen; hemi stap anda long manajmen blong EC; PEO hemi risponsibol blong stanemap mo fasin blong rejistresen blong ol man we bae oli vot mo ol narafala eleksen.

PEO moo I VEO oli pablik seven. Wok mo risponsibiliti blong olgeta i stap insaed blong elektorol lo. Lo i talem se wok blong PEO hemi: (a) mas lukaotem ol ekspendijia (ol fasin blong mane) blong eleksen; hemi mas divaedem Vanuatu long wanwan rejistresen eria; (c) hemi mas lukaotem wok blong ol rejistresen ofisa; (d) hemi mas lukaotem rod blong transpot, travel mo ol ekwipmen blong ol rejistresen ofisa; (e) hemi mas lukaotem wok blong mekem mo printin ol nasonol kad; (f) hemi mas mekem wan rod blong mekem se ol man Vanuatu we oli stap ovasi oli save vot; (g) hemi mas mekem, givimaot mo publijim ol elektorol lis; naoia oli no mo mekem ol elektorol kad be oli givim ol ID kad.; (h) hemi mas givim infomesen long ol vota mo long pablik; (i) hemi mas mekem, givim mo provaedem sekiuriti long ol pepa blong vot, ol bokis blong vot mo ol ekwipmen we ol ples blong vot bae oli nidim;

(j) hemi mas mekem mo givim ol instruksen long ol retuning ofisa mo ol poling klak (ol asisten long ples blong vot); (k) hemi mas mentenem mo lukaotem gud ol rikod blong eleksen; (l) hemi mas mekem ol ripot blong eleksen; (m) Hemi mas mekem ol wok we EC i givim long hem folem Konstitusen mo ol lo.





Pat 2:

Elektorol Operasen, ol Ofens mo ol fasin blong feksemap ol problem.



Rod blong Eleksen hemi longfala tumas, i gat fulap wok we i nidim gudfala planin. "Dedlaen" (taem man i mas rispektem ol deit) hemi impoten long elektorol wok. I gat fulap wok blong mekem olsem ol rekrutmen mo trening blong ol staf, ol pepa blong pablik infomesen, mas pem mo givimaot ol materioli. Planing hemi impoten tumas blong mekem sua se eleksen mo operesen blong eleksen i hapen long stret taem.



Ol samting ia oli impoten tumas long saed blong folem gud Elektorol operesen: rejistresen blong ol vota, poling stesen (ples blong vot), kaontem ol vot, ademap ol vot mo talemaot long publik ol risul (nominesen blong ol kandidat we hemi impoten tumas bae yumi tokbaot long difren ples insaed blong buk ia).

Mo tu, ol lo blong eleksen oli givim ol ofens we wan kandidat hemi mas lukaotem gud, mo ol rod blong folem blong feksemup ol elektorol problem.

5. Rejistresen blong ol vota

Blong mekem sua se ol man oli gat raet blong vot oli save vot, yumi mas gat wan stret rejista we hemi tru . Rejista hemi database (stamba blong ol infomesen) blong ol man we oli rejista blong vot. Rejista hemi mas gat ol komplet mo tru infomesen blong mekem se ol man oli save vot mo blong mekem se ino gat problem long taem blong vot.

Rejistresen blong vota hemi blong jekem, bifo dei blong vot, spos ol man oli gat raet blong vot. Rejistresen i helpem ol elektorol ofisa (ol bos blong eleksen) blong jusum gud ol pepa mo ol namba blong ol pepa folem namba blong ol man long wan eria.



5.1 Raet (elijibiliti) blong vot mo rejista

Lo i talem se wan man hemi gat raet blong vot spos hemi gat 18 ia finis taem hemi kasem stret dei blong eleksen.

Wan man hemi gat raet blong vot long ples blong vot blong hem, hemi mas liv long distrik blong hem long tri manis (3) taem hemi oli mekem elektorol lis.

Taem wan man hemi residen (hemi stap liv long ples ia oltaem) long wan ples blong vot we hemi no stret rejistresen ples blong hem, mo spos hemi no gat rejistresen long wan narafala ples, rejistresen ofisa bae i givim rejistresen long hem long ples blong residens blong hem (ples we hemi stap liv long hem naoia).

5.2 Wea ples blong vot mo fasin blong vot

Statem long 2017, lo i talem se ol man oli save rejista eni taem nomo. Lo i talem tu ol rejistresen blong ol vota is jud stop siks wik bifo dei blong vot. Spos hemi wan nesonol eleksen, ol rejistresen bae oli klos olbaot long kantri siks wik bifo dei blong vot. Spos hemi wan provinsol o wan miunisipol eleksen, rejistresen bae i klos long stret provins o miunisipaliti blong eleksen siks wik bifo dei blong vot be bae i open yet long ol narafala ples blong kantri.

VEO i stap stanemap ol provinsol ofis long ol aelen. Ol man we oli wantem rejista oli mas harem gud VEO i stap wea long taem ia. Ofis blong VEO i open eni taem nomo blong ol man oli save rejista.

Insaed blong rejistresen senta, bae oli givim wan fom (wan pepa) long yu. Yu mas fulumaot pepa ia. Yu mas sowem rejistresen bet (birth) setifiket blong yu. Spos yu no gat wan bae yu no save rejista olsem wan vota. Bae yu save aplae long wan long Sivil Registri.

Taem yu fulumaot pepa blong rejistresen, i mas gat tu (2) witness bae oli saen mo tufala oli mas stap long sem ples olsem yu mo oli mas gat wan valid bet setifiket. Wan long ol witness ia oli mas stap long sem ples blong vot olsem yu. Spos neibo blong yu, bae i gud. Ino gat fi (yu no pem) long rejistresen.

Rejistresen ples blong ol man bae hemi ples blong vot bong ol man, mo i klosap blong haos blong olgeta. Spos wan man i go stap long wan narafala ples we i gat wan difren ples blong vot we ino semak olsem bifo (no mata we hemi stap long sem konstituensi), hemi mas rejista bakegen.

Taem hemi rejista, bae oli givim wan nasonol ID kad long hem. Oli no mo givim ol elektorol kad. OKala blong ol elektorol kad hemi blu long ol rurol eria mo red long ol eban eria (ples olsem Vila mo Luganville) mo bae hemi olsem wan smol bu. Elektorol kad i gat wan ID namba we hemi wan namba blong sowem ples insaed blong ples blong vot mo i gat namba blong pepa. Spos man i wantem vot, hemi mas sowem elektorol kad long stret ples blong vot, spos no bae hemi no save vot.

Spos yu lusum kad blong yu bae oli givim wan niu ID kad we i bes long bet setifiket blong yu. Long ples blong hedkwata (stamba ples blong rejistresen), oli save givim ol narafala kad oltaem nomo be bae oli stop 2 wik bifo dei blong vot.

Spos wan man i tinting se hemi gat raet blong vot be nem blong hem ino stap insaed blong lis, hemi save go toktok wetem PEO. PEO bae hemi riviuwem infomesen blong man ia. Spos oli no glad long desisen blong PEO, oli save apil i go long EC. Taem EC i givim desisen blong hem, bae i stop long ples ia nao. Bae oli no save apil long wan narafala ples.

Joen Rejistresen

Long 2017 Gavman blong Vanuatu i disaed blong givim wan ID long evri sitisen blong kantri. Semtaem Gavman i disaed blong putum togeta sivil mo vota stamba rejistresen blong mekem se rejistresen oli kam gud mo blong bildim tras mo konfidens long rejistresen fasin mo mekem se ol dipatmen blong Gavman oli wok togeta gud. Oli mekem wan nasonol rejistresen ID kad long evri man. Wok ia Sivil Rejistri mo Vaetel (impoten tumas) Statistics wetem VEO, oli mekem. Oli stanemap wan bigfala kampen blong joen rejistresen we i finis bifo ol jenerol eleksen.



6. Taem blong vot mo taem blong kaontem

Rod blong eleksen hemi nidim fulap wok. Statem wetem ol stamba long lo mo ol elektorol otoriti, ol rejistresen blong ol kandidat, kampen, infomesen blong ol vota mo rod blong givim infomesen, taem blong vot mo taem blong kaontel ol risul. Oli mas mekem ol wok ia blong mekem se eleksen hemi wan sukses (i kam gud). Be oli mas tingbaot se sukses (o felia – ino kam gud) blong eleksen hemi dipen bigwan long rod mo fasin oli folem bifo taem blong eleksen.



Kwaliti blong ol vot mo taem blong kaontem hemi impoten tumas blong mekem sua se ol eleksen oli folem stret fasin mo blong mekem sua se ol risal oli tru. Vanuatu i rispektem ol stamba obligesen blong hem folem intenesonol lo we i talem se ol man oli gat raet blong vot, vot hemi sekret, ino mas gat korapsen mo oli mekem folem stamba toktok ia “wan man, wan vot”.

6.1 Taem blong vot (Poling)

Taem man i save vot long wan fasin we ino gat man i traem blong toktok nogud long hem o fosem hem, mo taem vot blong hem hemi gat sem raet olsem ol narafala vot, i mining se i stamba blong elektorol fasin ia i folem demokrasi.



Deit blong vot (poling dei) blong Palemen vot bae i kam long Presiden mo advaes blong hem i kam long Praem Minista we i mekem konsultasen wetem Elektorol Komisen (EC) mo Prinsipol Elektorol Ofisa (PEO).

Long saed blong Provinsol eleksen (lokol gavamn, miunisipol eleksen) i semak nomo, EC i givim deit blong vot be hemi konsultem Minista blong Intenol Affairs.

Dei blong vot bae hemi long wan woking dei, neva long wan wiken. Taem blong vot long Vanuatu, bae hemi long wan dei nomo long 7.30 long moning kasem 4.30 long aftenun. Ol namba long vota bae hemi difdifren long wanwan ples. Long taem ia oli divaedem kantri long konstituensi mo long polin distrik, long

nasonol, provinsol o munsipol eleksen.

Polin stesen hemi ples blong vot. I gat wan polin stesen long wan polin distrik. I gat sam distrik oli gat moa polin stesen pitim ol nara ples, hemi dipen long namba blong ol vota mo fasin blong kasem stret ples blong vot (hemia i hapen long ol ples we i gat fulap man). Ples blong polin stesen (ples blong vot) PEO i givimaot bifo eleksen. I gat baot 352 polin stesen (ples blong vot) long kantri.

Wan man i save vot long eleksen spos:

- a) nem blong hem i gat nesonol ID kad blong hem; mo
- b) hemi sowem stret kad blong hem long ples blong vot long dei we hemi vot.



Hemi impoten tumas!

Blong givim raet blong yu blong vot yu mas go long stret ples blong vot. Nem blong yu bae i stap long ples blong vot ia (poling stesen). Bae yu mas sowem elektorol kad o nasonol ID blong yu.



Rejistresen ofisa bae hemi advaes long ol ples blong polin stesen long konstituensi blong hem after konsaltasen wetem PEO. Stret ples blong hem EC bae i mas apruvum. Bae oli putum ol ples blong vot long ofisol pepa (Gazet) bifo dei blong vot.


Ol polin stesen oli stap long ol skul, mo komiuniti senta mo i gat ol presaedin ofisa oli manajem wetem ol polin asisten.

Bae i gat polis i stap long saed blong sekiuriti. Ol man we oli rejista bae oli mas vot long stret ples we oli rejista. Ol ajen blong ol politikol pati mo ol elektorol obseva oli save stap insaed olsem ol witness blong vot.

Evri polin stesen (ples blong vot) hemi gat wan ritening (presaedin) ofisa we rejistresen ofisa hemi apoentem. Rejistresen ofisa hemi apoentem tu ol asisten blong helpem retenin ofisa.

Antap long ol vota mo ol polin ofisa, ol man ia tu oli save kam insaed blong polin stesen:

- Ajen blong ol politikol pati o kandidat (oli mas gat baj blong olgeta – nem blong olgeta antap long clos blong olegeta) we VEO i givim raet long olgeta.
- Ol nesonol mo intenesonol obseva (mas putum baj) we VEO i givim raet long olgeta.
- Ol memba blong niuspepa, radio mo TV wetem kad blong wok we hemi valid yet mo baj blong VEO.
- Ol polis we i wok long stret ples blong vot ia (bae oli mas stap long doa be oli save kam insaed tu).




Ol ajen blong kandidat we oli stap insaed oli mas gat raet we VEO i givim.

Ol kandidat oli kam long vot insaed blong polin stesen be afta oli mas go aot. Afta ol kandidat oli save kam insaed long polin stesen taem oli stat kaontem ol vot.

Nomal polin stesen


I gat 3 ofisa oli manajem polin stesen:

- Presaedin ofisa (retuning ofisa) (PO)
- 2 asisten (polin asisten) we tufala i mekem wan jekpoen



Ol bigfala polin stesen

Ol bigfala vot ples bae i gat fulap jekin poen from hemi wan ples we i gat fulap mo bae i gat wan man i jekem kiu blong mekem se ol vota oli hariap.



Ol pepa blong vot oli kam long VEO long Vila mo oli putum insaed blong wan sekiua ples long ol provins . Staf blong VEO mo ol polis oli eskotem ol pepa long taem blong transpot. Ol rejistresen ofisa bae oli deliva ol pepa blong vot long ol presaedin ofisa bifo deit blong vot.

Ol PO's oli save putum ol pepa insaed blong ples blong vot, wetem polis spos hemi luk se i nesaseri (mas mekem). Ol PO's oli jekem ol pepa mo givim long ol klak (ol asisten).

Fasin blong vot hemi semak long nesonol, provinsol mo miunispol eleksen. Fasin blong openem ol ples blong vot: oli jekem ol pepa, oli putum gud boks we i empti long ol man oli save lukluk. Oli mas sowem long polin ofisol, ol kandidat, ajens blong ol kandidat mo ol elektorol obseva. Presaedin

ofisa hemi hariap blong silim (blokem) empti vot boks wetem sil we oli gat 2 spesol namba. Ol vota oli mas sowem ID kad long polin ofisa blong oli gat raet blong vot. Spos wan man i no gat kad

blong hem, bae hemi no save vot. Poling asisten hemi jekem ID kad blong hem, talem se vota i stap long stret ples blong vot, mo stampem kad blong hem.



Poling asisten i jekem spos nem blong vota i stap insaed long rejista. Spos nem blong wan man ino stap insaed blong rejista, bae hemi no save vot, no mata we kad blong hem i gud. Poling asisten i jekem kad blong luk spos hemi stret wan (age, man o woman) Spos i stret, polin asisten i putum wan tik long lef insaed blong rejista klosap



blong namba blong vota (man i vot).



Polin asisten i givim wan envelop mo wan smol buk wetem ol nem blong kandidat long vota.

Vota i go hemwan insaed blong boks blong vot mo hemi

jusum pepa blong stret man hemi wantem vot long hem (jekem foto mo simbol blong hem) mo putum insaed blong envelop. Vota i kamaot mo sowem envelop long polin asisten. Polin asisten hemi jekem se i gat wan envelop nomo be ino tajem envelop. Vota i putum envelop insaed blong boks. Polin asisten i jekem gud ol narafala pepa we i stap.



Spos wan man hemi handikap o hemi olfala tumas, hemi save karem wan man wetem hem i go insaed long vot boks.

Afta, polin asisten i stampem elektorol kad o nasonol ID kad long ples we i talem "dei blong vot" wetem ofisol stamp blong gavman mo putum stret deit mo inisol blong hem.

Polin asisten i putum ink long finga blong vota, givim bak kad blong hem mo vota i mas go aotsaed.



Vota i karem wan vot pepa nomo blong wanwan kandidat mo wan envelop. Oli mas jusum wan pepa nomo (man we oli jusum) mo putum insaed blong envelop.

Vot ples bae i klos long 4.30 long aftenun. Be, presaedin ofisa i gat raet blong ekstendem ol awa spos i gat ol man oli no vot yet i stap aotsaed. Presaedin ofisa bae i jekem wetem ol asisten blong hem mo ol agen blong kandidat bifo hemi mekem desisen blong ekstendem ol awa blong vot.

Lo i talem se wan we ino save vot long stret dei blong vot bae oli save jusum wan man blong vot folem tingting blong hem. Man ia bae i mas stap long sem ples blong vot olsem yu. Wan proksi fasin (man i tekem ples blong yu long vot mo i vot folem tingting blong yu) ino save vot pitim 2 man. Eni man we i gat rejistri kad blong hem finis i save aplae long wan proksi spos hemi no save vot long stret dei blong vot from hemi sik, hemi handikap, hemi olfala tumas, hemi wok long wan narafala ples, hemi wok o studi ovasi. Moa tu, ol elektorol ofisa we oli wok aotsaed ol polin stesen blong olgeta oli save karem wan proksi blong wan man i vot long olgeta folem tingting blong olgeta.

Man i askem proksi fom hemi mas sowem from wanem bae hemi no save vot long stret ples blong vot blong hem. Oli save karem proksi fom kasem 2 wik bifo stret dei blong eleksen. Spos rejistresen ofisa i luk se i tru man ia bae ino save vot, mo spos hemi luk se man we bae i vot folem tingting blong hem hemi rejista finis long sem ples olsem hem, bae hemi infomem apliken mo sendem proksi fom mo nasonol kad blong apliken long man ia we hemi jusum blong vot long hem.

Man bae i vot long proksi bae i mas vot folem fasin we hemi vot fastaem taem hem mekem long hem mo bae hemi mas mekem semtaem. Bae hemi mas sowem long ol elektorol ofisa kad blong hem, proksi fom mo nasonol ID kad blong narafala man we hemi vot long hem.

Taem stret taem blong vot i open, ol ofisa bae oli mas openem boks blong vot mo mas sowem long olgeta we i stap insaed long haos, empty boks. Oli silim tufala saed blong vot boks mo yusum ol sekiuriti sil mo raetem ol silin namba. Ol ajen blong kandidat bae oli save saenem fom mo rikodem ol namba long buk blong olgeta.

Vota i mas givim kad blong hem long eleksen asisten. Bae oli identifiaem vota taem oli komperem wanem i stap insaed blong kad blong hem wetem wanem i stap insaed blong elektorol rejista. Vota bae i karem wan smol buk wetem nem blong ol kandidat mo wan envelop. Vota i go insaed long boks blong vot hemwan nomo. Hemi jusum man we hemi wantem vot long hem. Hemi putum pepa we hemi jusum insaed blong envelop, putum envelop insaed blong smol vot boks aotsaed, sakem ol narafala pepa we hemi no yusum. Bae hemi putum ink long finga blong hem, karem bak kad blong hem mo go aotsaed.

Ol Poling Ofisol mo ol Polis ofisa we oli regista blong vot long poling stesen we oli wok long hem long dei blong vot, bambae oli save vot fastaem bifo poling stesen I open blong pablik I save kam vot. Ol nasinol obseva mo ol politikol pati/kandidet ajens oli sud stap insaed long poling stesen long taem ia.


Ol ajen blong kandidat o blong pati mo ol obseva bae oli vot bifo ol narafala man spos nem blong olgeta i stap insaed blong rejista long stret ples we oli stap long hem.

VEO i gat wan polisi blong mekem se bae i isi nomo blong ol handikap man oli vot. PO wetem ol polis oli mas lukluk aotsaed spos i gat eni handikap man mo karem olgeta i kam long foret. Oli mas tritim olgeta wetem rispek.

Spos wan vota i handikap, hemi save jusum wan man blong kam insaed wetem hem. Man ia hemi mas stap long rejista. Ol asisten, ajen blong pati o kandidat mo ol obseva oli no save helpem handikap man be PO nomo.

Ples blong vot i klos long 4.30 long aftenun. Presaedin Ofisa hemi save ekstendem ol awa spos i gat ol man aotsaed yet. PO bae i klosem ples blong vot taem ino mo gat man aotsaed. Taem las man i vot finis, PO i mas mekem hemia:

- Talem long ol vot asisten, ol ajens blong pati o kandidat se ples blong vot i klos.
- Silim (klosem long wan spesol fasin) hol blong boks blong vot (ballot boks) mo rikodem namba long “Rikod blong sil”.
- Talem long ol asisten blong kaontem namba blong ol man we oli vot. BLong mekem hemia bae oli mas kaotem ol tik wetem ol nem blong ol man (asisten 1) mo ol kros antap long ol nem (asisten 2) insaed blong rejista.
- Rikodem namba blong ol vota (jekem ol vot pepa we oli givim long ol vota) insaed blong “Not” we i stap insaed blong ofisol ripot blong eleksen.
- Spos ol namba ino stret, ol asisten bae oli mas kaontem bakegen mo faenem wanem i rong.
- Oli mas redi blong stat kaontin blong vot.



Wan vota o wan ajen blong pati o kandidat o wan eleksen ofisol i save mekem wan komplek spos hemi luk se wan samting ino stret long taem bifo polin (bifo oli vot), long taem blong vot mo long taem blong kaontem ol vot.

PO i mas traem blong fiksemap kwiktaem problem ia long ples blong vot.

Spos man i komplek, hemi mas komplek long Prinsipol Elektorol Ofisa. Spos hemi no glad yet, bae i mas go long Elektorol Komisen we desisen blong hem i faenel.



6.2 Kaontem ol vot

Hemi impoten tumas spos ol kandidet mo ol ajen blong olegeta oli lanem gud fasin blong kaontem ol vot, bae i helpem olgeta bigwan mo bae ino gat wan problem long taem ia.



Oli stat blong kaontem ol vot insaed blong ples blong vot taem las man i aot finis. Ol asisten oli sta kaontem mo Presaedin Ofisa hemi hed blong olgeta. Ol ajens blong pati mo kandidet wetem ol obseva oli save watjem kaontin insaed. Ol man aotsaed oli save folem tu be oli mas stap aotsaed. Ol kandidet oli save stap insaed blong watjem kaonting.

Taem oli klosem vot, oli openem boks blong vot mo karemaot ol envlop. Presaedin Ofisa i karemaot ol pepa insaed mo sotemaot wetem nem blong ol kandidet mo ol pepa we ino gat nem. Ol pepa we ino gat nem oli putum long wan narafala ples. Taem oli finis wetem ol pepa blong vot, oli stat blong kaontem. Ol elektorol asisten oli raetem ol risal long saed blong wanwan kandidet mo ol invalid pepa long 2 seperet pepa.

Taem oli kaontem, presaedin ofisa bae i talem se i gat wan invalid pepa (empti) taem: (a) i gat wan mak o wan samting we i givim aedentiti blong man we i vot; (b) pepa blong vot ino stap insaed blong envlop o hemi no envlop we elektorol asisten i givim; o (c) pepa blong vot i stap insaed long wan envlop wetem sam narafala pepa. Hemia ol invalid vot mo oli no kaontem olgeta.

Presaedin Ofisa i askem elektorol asisten blong kaotem ol signeja insaed blong rejista blong vot. Spos namba blong signeja insaed blong rejista blong vot i no matjem (ino semak) namba blong ol envlop, oli raetem problem ia.

Taem kaoting i finis o taem oli kaontem bageken, wan kandidet or ajen blong hem oli save askem presaedin ofisa blong kaotem bageken ol vot be presaedin ofisa i save rifuz (talem no) spos hemi tingting se rikwes ia ino stret.

7. Kaontem ol risal mo talemaot long ol man

Taem kaontin i finis, presaedin ofisa bae i talem se kaotin i finis mo givim risal insaed blong ples blong vot.

Taem kaotin i finis, presaedin ofisa i finis ofisol ripot blong hem, mo mas talem hemia a) namba blong ol man we oli rejista (ol vota); b) namba blong ol man we oli vot; c) namba blong pepa we oli invalid (oli no kaontem olgeta); d) namba blong vot long wanwan kandidat; e) ol narafala samting we oli mas talem folem ruls mo ol narafala samting we PEO i wantem talem. Oli mekem ripot long Franis, Inglis mo Bislama mo Presaedin ofisa mo ol elektorol asisten bae i mas saenem. Eni kandidat or ajen blong hem oli mas saenem. Taem oli saenem ripot finis, oli putum insaed long wan envelop we i klos gud (sil); presaedin ofisa i (klosem gud) tu ol pepa blong vot (ol babot) mo ol invalid pepa (hemia we oli no save kaontem)

Tufala ripot mo ol sil paket we i klos gud (oli putum insaed long boks blong vot) oli givim long rejestresen ofisa we hemi risponsibol blong konstituensi. Taem hemi kasem, hemi mekem sua se i gat sekiuriti long transpot blong hem taem oli karem long EC hedkwata long Vila. EC long Vila i kaontem gud ol risal blong vot mo talemaot ol risal long wanwan konstituensi. Ol kandidat we i winim fulap vot pitim ol narafala kandidat hemi winin eleksen mo hemi wan elekted kandidat.

Kwiktaem, EC i mekem sua se oli talemaot ol risal long wanwan konstituensi mo publijem long Ofisol Gazet (pepa).



8. Elektrol Ofens

Elektrol Ofens oli man we i brekem lo mo ol ruls blong EC. Ol ofens ia long saed blong vot mo kaontin i save givim faen long man o hemi go long jail. Hemia ol ofens:

Eni man we i blokem wan elektrol ofisa mo stopem hem blong mekem wok blong hem; o wan man we i givim kiaman infomesen long EC, long PEO o long wan narafala elektrol ofisa , hemi komitin wan ofens mo hemi save faen o go long jail.

Ol narafala elektrol ofens, oli:

- Spolem ol kad, ol elektrol pepa mo ol notis;
- Raetem kiaman samting long saed blong ol kandidet;
- Karem ol pepa blong vot ;
- Spolem o karem ol elektrol pepa;
- Vot long wan ilegal fasin – long wan ples blong vot we hemi no stret ples – mo vot pitim wan taem;
- Kiaman vot – kiaman long nem blong wan narafala man no mata se man ia i laef yet o i tet finis mo tekem nem blong hem;
- Pem mane long saed blong vot;
- Pem mane, givim ol samting blong fosem ol vota long saed blong vot;
- Fosem ol vota long wan fasin o toktok;
- Talem ol kiaman toktok long saed blong kandidet;
- Blokem o stopem wan elektrol ofisa long wok blong hem;
- Vot long wan ples blong vot (polin stesen) we hemi no stret ples blong hem;
- Mekem wan fasin olsem ol samting i talemaot finis antap mo fosem ol vota;
- Sakem o spolem ol pepa blong vot; mo
- No respektem sekret blong vot.

Ol kandidat oli mas mekem sua se oli folem gud lo mo no mekem wan samting we hemi wan "ofens" long taem blong elektorol kampen mo long taem blong dei blong vot. Spos man i komitim wan ofens hemi wan kriminol aksen mo bae i gat konsekwens long hem (faen mo jail).



Spos oli akiusem wan man long wan ofens, man ia hemi mas gat jans blong defendem hemwan. Spos i gat konviksen, i mas gat evidens se i gat kriminol fasin – mo long wan fasin we i stret mo tru. Lo i talem se man i save apil spos hemi wantem. Spos i gat wan ofens oli mekem long wan polin stesen (ples blong vot), presaedin ofisa i mas raetem rikod insaed long buk blong hem mo askem polis oli kam karem man i komitim ofens.

Ol impoten atikol long RPA i go long ol kandidat (61A):

Deit blong stopem ol ripresentesen alowens (mane we wan MP i kasem), mane o donesen (ol narafala samting).

Ol kandidat oli no save spendem mane o givim long konstituensi blong hem, mane blong alowens blong hem (spos hemi wan MP) o ol narafala samting olsem donesen. Fasin ia i stat long en blong Pahlen o disolusen (taem oli blokem) blong Pahlen kasem en blong dei blong vot. Atikol 61 B i givim ol eksepsen long dei blong vot mo atikol 61 C i givim ol eksepsen long taem blong kampen.



9.

Objeksen (ol man oli no agri), komplen mo ol petisen (pepa blong blokem)

Lo blong Vanuatu i gat fulap fasin blong lukluk long ol samting we ino stret. Hemi impoten long ol vota, pati mo dendidet se oli save gud ol fasin ia from spos ol man oli no save gud ol informesen bae oli no save gud ol raet blong olgeta mo bae i afektem fasin blong eleksen.

Hemi impoten blong mekem ol difrens long ol ofens o problem: spos hemi wan elektorol objeksen o komplén, bae elektorol otoriti oli feksemap; spos hemi wan legol problem, jiudiseri bae i lukluk long hem; spos ol apil bae i go long kot. Long Vanuatu, stamba blong lo i givimaot ol difren rod blong feksemap ol problem mo dispiut. Oli: a) ol objeksen (wetem elektorol lis); b) ol komplén (long saed blong fasin blong ol elektorol ofisa mo elektorol asisten o ajén; c) ol akiusesen long kriminol ofens; d) ol petisen (oli jalenjem (oli no agri wetem) risal blong eleksen).

Long ol eleksen i mas gat trus. Blong ol man oli save trustem eleksen, oli mekem ol rod mo fasin blong lukatoem gud objeksen, komplén o jalenj we maet ol man oli gat.

Spos ol man oli no trustem eleksen, i mas gat ol rod mo fasin blong lukaotem ol komplén blong luksave wanem i hapen mo blong luk spos oli folem gud lo.

Spos hemia i hapen, yumi save se eleksen hemi stap long wan stret fasin mo ol politikol raet blong ol sitisen oli stap gud.



9.1 Ol objeksen long elektorol rol (lis o rejista)

Eni man i save givim long PEO wan objeksen spos hemi ting se nem blong hem ino stap insaed blong elektorol rejista. Hemi mas sowem evidens mo ol toktok long PEO. Spos PEO i faenem se klem blong hem i valid (i tru), hemi save askem se nem blong hem bae i go insaed rejista mo givim wan nesonol kad long hem.

Spos man ia ino satisfae wetem desisen blong PEO hemi save apil i go long EC long 48 awa, mo givim leta ia long wan registresen ofisa. Ofisa ia i mas givim kwiktaem leta long EC. EC i save akseptem o sakem apil blong man ia. Desisen blong EC hemi faenel (man ino save go long kot).

PEO i save tekemaot nem blong rejista spos hemi luk se i stret blong mekem hemia; oli mas talem long man ia kwitaem mo karem bak nanosol kad blong hem. Man ia i save apil long EC long 48 awa taem oli talem aot long hem mo givim apil leta blong hem long wan registresen ofisa. EC i save akseptem apil o i save sakem. Desisen blong EC hemi faenel, man bae ino save go long kot blong apil bakegen.

9.2 Komplek akensem ol elektorol ofisa

Spos wan man i gat komplek akensem wan elektorol ofisa, hemi save givim komplek leta blong hem long ol otoriti blong judisieri. Hemi mas givim komplek long 21 dei stat long dei we alej ofens i hapen.

Rod blong lo blong mekem ol komplek oli mas folem ol ofens ia:

- Spos hemi ting se wan man i rejisterem wan riko o wan infomesen we hemi kiamn o ino tru;
- Alowem wan man we hemi no handikap blong karem help long wan narafala man;
- Spos oli blokem ol man we oli handikap blong karem help blong vot;
- Spos oli blokem wan man we i gat nem blong hem insaed blong registri, long stret ples, blong vot;
- Spos oli no wantem kaontem wan vot pepa, long wan kandidet, we hemi valid;
- Spos hemi no mekem wok blong hem mo hemi no gat stret risin blong no mekem.

Spos oli luk se komplek hemi tru, elektorol ofisa bae i save faen o go long kalabus, o tufala semtaem.



9.3 Ol elektorol petisen

Wan elektorol petisen hemi wan legol jalenj (man ino agri) long saed blong risul blong eleksen. Supreme Kot bae i harem.

Ol man we oli save givim wan elektorol petisen, oli:

- a. eni man we nem blong hem i stap insaed long registri; mo
- b. wan kandidat

Wan elektorol petisen hemi no valid (hemi no save stanap) spos oli no submitim (putum) long 21 dei afta we i kamaot long ofisol gaset (ofisol niuspepa). Mane ia bae oli givim bak long man we i putum petisen afta we oli harem petisen rikwes. Kot is save oda se sam mane bae oli holem spos oli mekem desisen se man ia bae i mas pemaot mane.

Ol elektorol petisen bae oli mas raetem, mo bae ol mas talem gud risin blong mekem petisen.

Toktok blong kot bae i gohed long Inglis, Franis o Bislama, hemi dipen long man we hemi mekem petisen. Wan intepreta i save intepret long kot (tanem toktok long narafala lanuis). Taem hemi harem petisen, Supreme Kot bae i save:

- a. talem se ol eleksen oli no valid (oli no tru);
- b. givim nem blong wan difren kandidat (wan narafala man) mo talem se man ia hemi winim eleksen; mo
- c. sakemaot petisen mo talem se wina blong eleksen bae hemi stap nomo.

Supreme Kot i save talem se wan eleksen hemi invalid (ino gud), spos:

- a. oli gat evidens se ol korapsen i hapen olsem ol braeberi, tritin, toktok strong blong fosem man mo ol samting ia i spolem fasin blong eleksen;
- b. Oli no folem lo long saed blong fasin blong vot o narafala samting mo hemi spolem risal blong eleksen;
- c. Kandidet, long taem blong eleksen, hemi no kwalifae blong stanap; o
- d. Oli no folem stret fasin taem oli kaontem ol vot mo i afektem risal blong eleksen.

Win blong wan kandidat hemi no valid (gud) spos hemi karem wan konviksen finis long kot o spos hemi stap insaed blong korapsen bifo o spos hemi traem blong mekem korapsen. Taem wan kandidat i talem se hemi winim eleksen from hemi talem se hemi karem fulap vot, Supreme Kot i save oda se oli kaontem ol vot bakegen.

Desisen blong Supreme Kot bae i kamaot kwiktaem long man we i givim petisen mo long ol narafala man. Ino gat apil taem Supreme Kot is givim desisen blong hem finis.

Pat 3:

Stanap olsem wan kandidat



OK yu wantem stanap olsem wan kandidat?

I gud tumas. Bae hemi wan jalenj mo bae hemi wan gudfala taem tu. No mata we ol fren o supota blong yu oli stap wetem yu o yu stanap yuwan nomo, i gat fulap samting bae you mas save long fasin mo rod blong folem (maet you save finis ol lo mo regulesen we yu mas folem)

10.

Stanap olsem wan kandidat: Wan introduksen

Stanap olsem wan kandidat hemi gud tumas mo hemi wan jalenj mo bigfala risponsibiliti. Yu mas save se bae i gat fulap kandidat pitim ol posisen, so yu mas tingting gud se maet bae yu save lus.

Spos you mekem desisen blong stanap olsem kandidat, bae yu mas gat ol ansa blong ol kwestien. Fas kwestien hemi: **“from wanem yu wantem stanap?”** Ol vota bae oli wantem save se yu, wanem kaen man mo wanen ol tingting blong yu. Yu mas redi blong givim ansa blong yu long wan klia fasin.

Olsem wan kandidat yu mas gat ol strong ansa long ol poen ia:

1. Yu gat wan intres long sevem pablik?
2. Yu gat ol strong tingting long ol poen we oli impoten?
3. Yu luk olsem lidajip i mas jenj?
4. Yu ting se yu save mekem wan gudfala wok pitim man we i stap insaed finis?
5. Yu save talem long wan sentens from wanem you wantem stanap?
6. Wanem ol poen we oli impoten long yu mo wanem solusen bae yu karem long hem?
7. Wanem i mekem se yu wan gudfala lida?



Stamba tingting yu mas save:

1. Yu save se yu wan impoten man mo yu biliv long wanem yu save mekem?
2. Yu save askem mane long ol fren, ol famle mo ol narafala man?
3. Spos ol man oli talem ol rabis samting long saed blong yu mo oli lukluk laef blong yu klosap nomo, bae yu save akseptem?
4. Famle blong yu oli glad se yu stanap long eleksen? Oli sapotem yu 101 %? Wanem bae i hapen long wok blong yu taem yu mekem kampen? Bae yu gat taem blong mekem kampen?
5. Bae yu save akseptem spos y ulus?
6. Yu tingbaot finis se bae yu stress, bae yu taet plente, bae yu spendem fulap mane long kampen blong yu?

Ol top siks (6) mistek we ol kandidat i mekem taem oli stanap fastaem long eleksen:

Taem kandidat hemi kampen Manaja.

Hemia ino gud nating. Kandidet hemi mas mekem wok blong hem blong karem ol vot mo karem mane. Maneja blong Kampen nao hemi bos bong rod mo fasin blong kampen.

I eli tumas blong stat

Hemi neva eli tumas blong statem kampen!

Mi no nidim fulap mane blong mekem kampen!

Mane hemi stamba samting blong wan kampen.

Oposisen blong mi bae hemi no wan samting nating.

Yu no mas ting se oposisen blong yu bae hemi no strong. Ating bae hemi strong!

Mi no nidim help.

Yu mas gat wan strong tim i wok wetem yu from bae yu nidim help.

Bae mi no save win.

Spos you go insaed long kampen be yu ting finis se bae yu lus, stret, bae yu lus!



10.1 Lesen blong fasin blong stanap olsem wan kandidat

Lesen #1

Yu mas save from wanem you stanap. Yu mas talem long ol man wok bae yu wantem mekem long wan sentens nomo.

Lesen #2

Yu wantem mekem wanem? Yu mas gat wan mesej mo wan tim blong mekem se fasin blong kampen hemi gud nomo.

Lesen #3

Mesej blong yu hemi mas stap positiv mo optimistik (ol gudfala samting), mo you mas talem long wan simpel fasin. I tru se yu wantem talem se bae you wan gud kandidat mo oposisen blong yu bae hemi wan nogud kandidat, be yu no toktok tumas akensem oposisen.

Lesen #4

Yu mas ripitim mesej blong yu plente taem mo yu mas mekem se mesej blong yu i sot nomo. Tingbaot KISS (Kipim I Sot mo Simpol)

Lesen #5

Yu mas gat kompesen mo luksave ol problem blong narafala man. Maet yu save toktok gud be spos yu no luksave problem blong ol man bae yu no save win.

Lesen #6

Yu olsem kandidat yu mas mekem imej blong yu (talem wanem kaen man). Yu no letem oposisen i mekem imej blong yu. Spos ol man oli no save talem se yu wanem kaen man long kampen blong yu, oposisen bae i talem se yu wanem kaen man.

10.2 Redi blong stanap

Taem yu disaed se bae yu stanap long eleksen, yu mas redi gud. Hemia ol advaes blong mekem. Oli stap mekem ovasi.

Mekem wan fasin se ol man bae oli luk se yu stret man.

Taem yu stanap fas taem, yu mas mekem ol samting oli gud. Yu mas putum gudfala mo klin klos, yu mas gat wan theme, ples i mas luk gud, yu mas stanap mo toktok gud. Ol man bae oli mas luk se yu wan profesionol man, se yu prepea gud, se yu ogenaes gud, mekem se ol man bae oli wantem vot long yu.

Yu mas save from wanem you stap mekem hemia

Tingbaot 3 or 4 risen from wanem bae yu wan gudfala lida mo no fogetem ol risen ia. Spos yu save gud from wanem yu wantem win eleksen bae kampen blong yu in kam gud, no mata oposisen i traem blong spolem yu. Spos you save gud ol risen ia, bae i helpem yu blong toktok gud long ol vota.

Yu lukaotem yu gud

Fulap samting i save hapen long wan kampen mo i save gat ol delei. Yu mas askem long kampen manaja se i gat inaf taem blong yu prepea gud, yu rest gud, yu mekem ol priperesen long wan profesonol fasin mo klos mo fasin blong yu i gud tumas.

Yu karem ol man we oli gat iksperiens mo karem ol woman tu.

Karem ol man we oli gat fulap iksperiens. Yu mas jusum kwiktaem kampen manaja blong yu we hemi i profesionol, taem yu disaed blong stanap. Karem ol woman i impoten tumas. Ol kandidat mo ol staf oli talem oltaem se ol gudfala kampen tim oli gat ol man mo ol woman

Wok oltaem blong mekem se ol skil blong yu i kam gud

Bifo you disaed blong stanap, ol kandidat oli jud mit wetem ol alae (ol man we oli stap long saed blong yu) bong olgeta mo wokem gud ol skil blong olgeta. Hemia bae i mekem se kampan bae i run god, samting ia i impoten tumas blong wan kandidat i save win.



11.

Stanap long ol eleksen: Ol woman

Ol man mo ol woman oli mas patisipet long wok blong komiuniti long saed blong politik, hemia hemi minim se bae hemi wan strong demokrasi; blong mekem se ol samting oli wok gud long demokrasi, ol woman tu oli mas patisipet long ol aktiviti. Ol man bae oli no bilif tumas long ol elektorol rod mo fasin spos ol woman ino stap insaed tu.



11.1 Impotens blong ol woman oli patisipet

Ol woman oli mekem haf blong populesen blong wol be ol patisipesen blong olgeta olsem lida hemi lo tumas. Samting ia hemi tru tumas long Saot Pasifik we ol palem en oli gat wan lo lev ol blong woman insaed. Long Vanuatu ino gat yet wan woman MP. Vanuatu hemi gat lowes ret long wol long eleksen blong woman long Palem en.

Ol woman oli fasem fulap problem long Vanatu long saed blong ripresentesen. I gat ol problem olsem kaljia, mane mo politik i blokem olgeta. I gat ol problem blong sosaeti, relijion, ekonomi mo kaljia we i mekem se ol woman oli no save kasem eleksen long Palem en.

Mekem se ol woman oli no save stanap olsem ol man.

Ples blong olgeta insaed blong ekonomi mo ol bilif long man i mekem se i blokem olgeta long stanap long eleksen. Mane tu i blokem ol woman blong stanap long eleksen. From ol woman oli no save karem fulap mane blong mekem ol kampen, samting ia i blokem olgeta tu. Wan narafala samting tu hemi vaelens akensem ol woman long taem blong eleksen mo akensem ol woman we oli stap insaed blong politik.

Wanem i blokem ol woman blong stanap long politik:



1. Stamba fasin blong ol big man blong politik: ol man bae oli vot long wan man o wan klan be oli no vot long wan pati. Ol kaljia fasin blong ol woman hemi wan problem mekem se ol woman bae oli no vot long ol woman.
2. Ol woman oli no gat fulap mane blong mekem kampen blong olgeta mo kasem tedei ino gat rod blong feksemap problem ia.
3. Fulap woman oli no ting se oli save suksid long wan eleksen – mo ol woman we oli save suksid tu oli tingting olsem.
4. Oli no gat supot long sosaeti mo long saed blong ekonomi.
5. Oli no save gud ol strong poen blong olgeta.
6. Oli no save gud rod blong eleksen mo politik.
7. Fulap taem, ol woman oli no ting se oli save stanap long eleksen even spos oli kwalifae finis long wok ia. Oli ting se oli no gud o oli no save mekem wok ia, olsem ol man.
8. Ol politikol pati long rejion oli no save se i gud tumas blong karem ol woman insaed blong politik

11.2 Ol jalenj blong ol woman

Ol woman oli mas fasem jalenj blong mas sowem kompetens (oli save mekem wok) mo se ol man oli laekem olgeta. Ol vota bae oli vot long wan man oli no laekem be bae oli no save vot long wan woman oli no laekem.

Ol woman oli mas sowem se oli kwalifae. Taem ol man oli stanap, ol vota oli ting se man ia hemi kwalifae finis. Taem ol woman i stanap, ol vota oli tingbaot se oli no save lukaotem politik mo lukaotem haos blong olgeta semtaem. Ol vota oli save se fasin ia ino gud be no mata, oli no vot long ol woman semak.

Ol advaes long ol woman

1. Ol woman oli mas pripea gud bifo oli talem se bae oli stanap long eleksen. Oli mas sowem se oli gat fulap ekperiens mo gudfala fasin long profesonol wok we oli mekem finis blong sowem se oli save mekem gudfala wok long politik. Hemia kwalifikesen blong olgeta bae i mekem se oli save stanap long eleksen.
2. Ol woman kandidat oli mas sowem konfidens, se oli kwalifae mo se oli save mekem wok taem oli toktok fastaem long kampen. Oli mas holem taet konfidens from samting ia bae i sowem se oli kwalifae. Ol vota bae oli save luk kwiktaem ol problem wetem ol woman from ol woman oli atraktem fulap atensen pitim ol man.
3. Samtaem ol woman oli no sua se oli save gohed long stanap be fasin ia ino gud. Oli mas sowem se oli konfident mo kwalifae blong stanap mo gohed.



11.3 Sowem kwalifikesen mo gudfala fasin long personol laef

Ol woman oli mas meksem eksperiens wetem gudfala profesonol fasin taem oli toktok; samting ia bae i mekem se oli kwalifae long stanap. Blong talem aot hemia long ol vota oli mas wok gud long presentesen mo wanen i stap insaed long introduksen long toktok blong olgeta. Oli mas tokbaot ol eksperiens fastaem bifo oli tokbaot ol personol laef blong olgeta.

Ol vota oli ting se ol woman we i stanap long eleksen oli wok had, oli kwalifae, oli konfiden, oli gat gudfala fasin long wok, oli save gud wok blong olgeta, oli kea long ol man, oli save toktok gud mo oli strong lida.

Oli gudfala kwaliti be ol vota oli no save yet se hemi kwalifae o no blong stanap. Oli mas sowem se oli gat konfidens, oli save mekem wok mo oli save gud wok blong olgeta. Samting ia bae i mekem se ol vota bae oli lesen long olgeta.

Ol impoten fasin blong sowem long ol vota hemi se hemi ones, hemi stanap long jastis, hemi save fulap samting, hemi wantem gohed, hemi konfiden, hemi gat gudfala fasin long wok, hemi gat vision (hemi save lukluk wok long fiujia) mo hemi kea long ol man mo ol nid blong olgeta.

Taem ol woman oli manajem famle blong olgeta – spos oli gat wan patna, pikinini, parens, ol brata mo sista, o wan miksa blong olgeta ia – i sowem se hemi save manajem wok tu. Hemi impoten long ol woman kandidat se oli mas tokbaot famle situasen blong olgeta, no mata wanem situesen hemi stap long hem. Taem ol man oli askem spos wan woman hemi save manajem famle mo wok semtaem, hemi mas givim wan gudfala toktok. Spos ol vota oli luk se hemi no save tokbaot saed ia o spos hemi no ansa wan kwestien we oli askem, ol vota bae oli no laekem hem, bae oli ting se bae hemi no save mekem wok mo bae oli no elektem hem.

12.

Elijibiliti blong wan kandidat (wanem i mekem se hemi save stanap)

Long Vanuatu i gat nasonol jenerol eleksen (long Palemén), ol provinsol eleksen (lokol) blong provinsol asembli, mo ol miunsipol eleksen. Elijibiliti long ol man blong stanap i stap insaed blong konstitusen mo ol elektorol lo. Elijibiliti blong trifala eleksen ia i gat sem samting mo sam narafala wan oli difren.

12.1 Elijibiliti blong stanap long Palemén

Blong stanap long Palemén, Konstitusen i talem se wan man i mas gat pitim 25 mo hemi mas stap olsem wan sitisen blong Vanuatu.

Lo i talem tu se:

- i) Hemi no mas gat wan samting we i blokem hem (diskwalifae)
- ii) Hemi no mas gat wan presen sentens
- iii) Hemi no mas gat problem wetem ol bank o gat mane we hemi holem we hemi mane blong gavman o ol ajensi blong gavman. Ol kondisen ia oli stap insaed blong Pat 12 long RPA.

Long saed blong lo, ol pablik seven oli no save stanap long eleksen. Lo i talem se ol man ia tu oli no save stanap long eleksen long Palemén:

- (a) Presiden blong Ripablik
- (b) Judj mo majistret
- (c) polis
- (d) Ol memba blong Nasono kansil blong Jif, ol memba blong Distrik Kansil blong Jif, aelen Kansil blong Jif mo eria Kansil blong Jif. Ol man we oli Jeman, Vaes-Jeman, Sekreteri mo Tresera oli no save stanap long eleksen.
- (e) Ol memba blong Tijim Sevis Komisen; mo
- (f) Ol memba blong Sitisensip Komisen

Spos wan man i wantem stanap long eleksen insaed long wan rurol konstituensi hemi wan man we hemi stret man ples blong ples ia. Spos wan man hemi no kam long stret rurol konstituensi hemi no save stanap blong ripresentem konstituensi ia.

12.2 Elijibiliti (raet blong stanap) long stanap long provinsol eleksen

Wan man hemi elijibol long stanap olsem wan kandidat long eleksen long wan lokol gavman kansil spos hemi wan sitisen blong Vanuatu, hemi rejista finis long ples we hemi wantem stanap, hemi no gat wan samting i blokem hem long vot, hemi no karem wan sentens long kot, inkludim wan suspended sentens we hemi no finis yet, hemi no gat problem wetem bank mo hemi gat pitim 21.

Hemi no kwalifae tu long stanap blong wok insaed blong lokol gavman spos hemi wan memba blong Pahlen, spos hemi no gat samting i blokem hem long stanap long Pahlen o spos hemi wok finis insaed blong kansil blong lokol gavman.

12.3 Elijibiliti (raet blong stanap) blong stanap long miunisipol eleksen

Hemi gat raet bong stanap long miunisipol (elijibiliti) spos hemi wan sitisen blong Vanuatu, hemi rejista olsem wan vota long miunisipaliti we hemi wan kandidat, ino gat wan samting i blokem hem blong hemi stanap, ino gat wan sentens long kot o wan sentens long jail we ino finis, hemi no gat problem wetem bank, hemi kasem 21 finis.

Wan man hemi no kwalifae long eleksen olsemwan kanselo spos hemi wan Minista finis, spos hemi nomo save stanap long Pahlen, hemi wok long kansil finis, hemi wan advaes o wan odita long kansil o wan patna blong wan man we i wok long olgeta. Mo tu, wan man we hemi wok long wan ples be hemi diskwalifae (nomo save wok from wan rabis fasin), hemi no save stanap long miunisipol eleksen.

Spos wan man hemi diskwalifae from hemi no pem ol rates blong hem, ol jaj ol narafala mane long kansil we i pitim 2 manis o spos hemi wan man we i gat kontrak finis wetem kansil blong provaedem miunisipol sevis, bae hemi no save stanap.

Spos elektorol ofisa hemi suspektem se wan man we bae i stanap, hemi no komplae wetem ol kwalifikesen we yumi jas talem, hemi save go askem kwestien long man ia, mo askem blong lukluk evidens blong sitisensip o age blong hem. Evidens ia hemi save kam long ol memba blong komiuniti we oli gat gudfala fasin mo ofisa i save askem evidens blong sitisensip pepa blong hem.

13.

Fasin blong nominetem wan kandidat (Fasin blong putum nem blong hem blong stanap)

Long Vanuatu, stamba blong lo i talem se ol politikol pati oli save nominetem wan man o hemi save stanap olsem independen. Politikol pati o independent bae oli mas givim nem ia long EC mo EC bae i lukluk long hem. Long elektorol fasin blong Vanuatu, oli nominetem ol kandidat long wan individuol fasin (wanwan). Politikol pati i givim nem blong hem o wan man nomo i save givim nem blong hem. Politikol pati i save nominetem 1, 2 o fulap man long wan ples, semak olsem wan man olsem individuol. Hemia i stret long multi-memba konstituensi (taem konstituensi i gat fulap man insaed)



Ol politikol pati o ol individuol we oli wantem stanap oli mas sowem se man ia hemi gat ol rikwaemen (wanem lo i askem) long saed blong ia, rejista, mo ol narafala samting Konstitusen o elektorol lo i askem

Fasin blong nominesen i folem fasin blong ol trifala eleksen we yumi tokbaot finis, wetem smol difrens long wanwan.

Ol man we oli wantem stanap oli mas putum aplikesen long VEO, yusum ol pepa we VEO i givim mo rispektem taem we EC i talem.

EC bae i talem mo bae hemi pablij nominesen time long ekeksen, we hemi 14 dei. Wanwan taem 14 ia bae i jenj, hemi depen long wanem kaen eleksen.

Ol bi-eleksen (taem wan man i nomo stap insaed long wok blong hem mo oli mas faenem wan narafala man blong mekem

wok blong hem) o snap-eleksen (oli sinaotem eleksen eli from wan problem) bae i gat taem i sot nomo. Nominesen blong ol kandidat i open long 8 long moning long fas dei blong nominesen taem mo bae i klos long namba 14 dei long 5 long aftenun, o long taem we EC i talem.

Folem ol nominesen, VEO bae i givim ol ballot (ol pepa blong vot – smol buk). Ol pepa (ballot) bae oli gat kala blong man o blong pati we EC i apruvum finis; ol independen kandidat oli gat waet kala. Bae oli putum nem blong ol kandidat insaed long smol buk folem fasin blong taem blong nominesen: ol fas kandidat we oli apruvum fastaem i stap antap. Ol kandidat blong politikol pati bae i stap fastaem, afta nomo ol nem blong ol independen.



13.1 Rod mo fasin blong nominesen long Palemén

Long taem bifo ol nominesen VEO i mas talemaot long pablik (ol man) se naoia bae hemi save karem ol nominesen.

Ol man we oli wantem stanap long Palemén, oli mas givim long VEO fom we oli saenem finis mo putum ol detel insaed, mo wan pepa we i statem se man ia hemi gat raet blong stanap folem lo. Man we i let (late) wetem nominesen blong hem, bae ino save putum fom blong hem.

VEO bae i lukluk long nominesen ia mo bae hemi askem long man ia blong jekem ol detel insaed blong pepa. VEO i mas mekem sua se hemi talem gud mo stret long man ia se hemi mas raetem gud se “hemi kwalifae long stanap long Palemén” be ino “hemi diskwalifae long stanap long Palemén”.

Spos VEO i ting se wan man hemi no kwalifae, hemi mas askem gud long man ia mo semtaem talem long EC.

Taem ol kandidat oli putum ol pepa blong olgeta finis, EC bae i disaed spos man ia hemi kwalifae o spos hemi no kwalifae.

Spos EC i tingting se wan nominesen (pepa blong stanap) i no stret, hemi save askem wan kandidat blong submitim bakegen nominesen blong hem 72 awa afta EC i askem be i no less pitim 14 dei bifo taem blong vot (poling).

Kandidet i mas pem 100.000 Vt (bae oli no save karem bak mane ia) mo givim 2 foto. (blak mo waet, i oraet)

Spos kandidat i karem nominesen long wan politiko pati we i gat simbol finis, kandidat i no gat nid blong givim wan simbol long hem, bae hem jas yusum simbol blong pati. Spos pati ino gat simbol, bae oli mas faenem/mekem wan

we EC i mas apruvum fastaem, mo kandidat bae i yusum simbol ia

Ol independent kandidat oli mas givim ol simbol blong olgeta long bak mo waet nomo mo ino mas gat wod insaed (simbol nomo).

Oli no save jenjem nem blong wan kandidat blong hemi kam olsem independen o hemi stap wetem wan narafala pati. Be kandidat i save karemaot nem blong hem mo putum nem blong hem bakegen long saed blong wan narafala pati o indenpenden long taem blong 14 dei ia.

Insaed blong nominesen i mas gat signeja blong 5 man (ol sponsa) we oli rejista finis insaed blong konstituensi blong kandidat. Ol sponsa ia oli no mas famle memba blong kandidat. Sponsa hemi save saen long wan man nomo. Spos wan sponsa i sponsorem narafala man, nem blong fas man nomo bae i stanap.

Spos ol kandidat oli karem wan sponsa we i sponsorem ol narafala man finis, kandidat ia bae i lusum nominesen blong hem, mo bae i mas givim wan narafala nominesen long EC wetem nem blong wan narafala sponsa (man blong saen).

Taem hemi karem wan nominesen wetem nem blong kandidat, PEO bae i mas givim wan risip.

Wan man i save stanap long wan konstituensi nomo. Wan MP i no save karem nominesen long wan narafala konstituensi spos i gat ol bi-eleksen. Ol politikal pati oli save nominetem ol narafala kandidat long wan konstituensi.

PEO, long taem long 24 awa afta nominesen taem i finis, hemi mas mekem lis blong ol kandidat we hemi kasem long ol nominesen



fom (pepa), putum ol komen blong hem mo givim long EC.

EC bae i talem se wan nominesen hemi invalid (ino gud) spos hemi luk se kandidat o ol sponsa oli no kwalifae. Desisen blong EC hemi faenel. Man ino save apil.

Nominesen bae hemi invalid spos EC i karem evidens se kandidat i tet finis o spos kandidat hemi karemaot nem blong hem mo givim leta ia long PEO.

Lis blong ol kandidat i mas stap long ofis blong evri Lokol Gavman Kansil, long Palemen, long VEO mo ol narafala ples we EC i jusum long taem blong 14 dei bifo eleksen.

Spos wan man hemi diswkalifae o hemi tet long taem long 14 dei, pati i save givim nem blong wan narafala kandidat be oli mas givim nominesen long 72 awa folem taem we oli talem se fas kandidat hemi no mo kwalifae, long PEO.

13.2 Rod mo fasin blong nominesen long provinsol eleksen

Long taem bifo ol nominesen VEO i mas talemaot long pablik (ol man) se naolia bae hemi save karem ol nominesen.

Ol man we oli wantem stanap long lokol gavman oli mas putum aplikesen long Lokol Gavman Ofisa long stret ples blong eleksen, yusum ol pepa we oli givim mo rispektem taem we EC i talem. Spos oli let (late) bae EC ino save akseptem nominesen blong hem.

Kandidet i mas pem 20.000 Vt (bae hemi no karem bak) wetem 2 foto.

Spos kandidat i gat simbol blong politikal pati blong hem we EC i apruvum, i gud, spos no bae hemi mas givim wan long hem

Nominesen (pepa wetem nem blong kandidat) i mas gat ol signeja o mo long ol sponsa we oli rejista finis long stret ples blong eleksen mo oli no famle memba blong kandidat.

Wan independen kandidat i mas givim wan nominesen nomo long lokol gavman rejion blong hem.

Rejistrasen ofisa we i karem nominesen i mas sendem kwiktaem long PEO, mo PEO i mas givim wan risip long kandidat.

Long 48 awa we oli karem ol nominesen, PEO i mas mekem wan lis blong ol kandidat, givim kopi long EC wetem ol komen blong hem, blong talem spos man i kwalifae o ino kwalifae.

EC i save talem spos wan man ino kwalifae spos ol sponsa blong hem oli no kwalifae o spos nominesen ino folem ol ruls.

EC i save askem wan kandidat blong putum wan nominesen bakegen spos hemi talem se fas nominesen i invalid long 72 awa afta we hemi talem infomesen ia be ino pitim 14 bifo eleksen dei.

Spos wan nominesen blong wan politikol pati hemi invalid (hemi no gud), oli save putum wan narafala nominsen be oli mas mekem long 72 awa taem PEO i talem desisen blong hem se narawan hemi invalid.

Spos wan kandidat i tet long 14 dei bifo polin dei (eleksen dei), pati i save putum nominesen long wan narafala kandidat long 72 awa afta we narawan i tet. Lo ino talem gud long saed blong ol independen kandidat be bae i semak, EC bae i askem long ol supota blong independent ia, blong nominatem wan narafala independen kandidat.

Lis blong ol kandidat bae i mas stap long ol lokol gavman kansil, long Palemen, long ofis blong Minista, long VEO mo ol narafala ples we Minista i talem, long 14 dei bifo eleksen dei.



13.3 Rod mo fasin blong nominesen long Miunisipol kansil eleksen

VEO i mas talem long pablik wetaem ol taem blong nominesen bae i open.

Ol kandidat blong miunisipol kansil oli mas putum long deit we Elektorol Komisen i talem wan dikleresen (wan pepa) blong kandidat we hemi saenem long fom we VEO i givim, mo wan dikleresen (pepa) i talem se kandidat hemi elijibol (i gat raet) blong stanap folem lo. I mas gat 2 foto. Ol man we oli let (late) bae oli no save mekem.

Ol independen kandidat o ol kandidat blong pati we oli no gat wan simbol, bae oli nid blong sowem wan drowin long wan pepa. Oli mas pem 20.000 Vt we VEO bae ino givim bak.

Wan dikleresen blong kandidat i mas gat ol signeja blong 5 man o mo, ol man ia oli mas rejista finis mo oli no famle blong kandidat.

Wan man ino save givim wan deklasesen long nem blong hem pitim wan konstituensi; spos hemi wan bi-eleksen, hemi no save mekem spos hemi wan memba blong miunisipol kansil.

Elektorol ofisa i mas givim wan risip long kandidat mo sendem dikleresen long PEO. PEO bae i mas givim long taem we Minista i talem, wan lis wetem nem blong ol kandidat we i stap insaed blong ol deklasesen blong kandidat we VEO i kasem mo sendem ol kopi long Minista.

PEO i mekem ol komen blong hem long saed blong validiti blong ol kandidat insaed blong lis.

Minista is save talem se wan kandidat ino save stanap spos ol sponsa blong hem oli no mekem ol stret samting o spos oli diskwalifae (oli no folem stret rod).

Minista bae i save askem long kandidat se hemi submitim wan deklasesen bakegen long 48 awa afta we hemi talem mo long 4 dei bifo ol eleksen, spos hemi ting se pepa blong kandidat ino folem stret rod. Taem Minista i talem se wan deklasesen blong wan pati ino valid (ino stret) o spos kandidat i tet long 4 dei bifo eleksen dei, wan kandidat blong sem pati i save putum pepa blong deklasesen long 48 awa long taem blong tet blong kandidat.

Bae oli mas putum lis blong kandidat long 4 dei bifo eleksen dei, long Taon Ol, Palemen, Ofis blong Minista, long VEO mo long ol narafala ples we Minista i talem.

14.

Fasin we ol pati mo kandidat oli mas folem

Ol pati mo ol kandidat we oli wantem stanap long eleksen blong Vanuatu oli mas promis blong folem ol fasin ia, mo oli mekem komitmen blong mekem hemia:

- Oli mas folem ol fasin blong demokrasi long saed blong eleksen, oli mas respektem ol elektorol lo, oli mas mekem sua se ol man oli trastem ol fasin blong eleksen mo oli mas respektem ol democratic raet blong ol man insaed blong Vanuatu ;
- Oli mas respektem mo folem ol prinsipol mo ol ruls long buk ia mo oli mas enkarejem ol man blong olgeta blong folem fasin ia. Ol pati mo kandidat oli mas mekem sua se ol memba, ol ajen mo ol representativ blong olgeta oli luksave gud mo respektem fasin ia.
- Oli mas enkarejem ol man blong respektem ol lo, regulesen mo ol rul blong elektorol lo. Oli mas saenem mo mas respektem long hat blong olgeta se bae oli folem ol lo, regulesen mo ol narafala samting insaed blong lo mo buk ia, inkludim seksen blong ol ofens;
- Oli mas enkarejem mo helpem blong mekem sua se ol man oli folem gudfala fasin long saed blong vot mo sekret blong vot;
- Oli mas folem wan fasin we i enkarejem rispek long saed blong eleksen;
- Oli mas enkarejem wan gudfala fasin mo folem wan gudfala fasin long personal laef blong olgeta. Oli no mas folem wan fasin we ol man bae oli luk se ino stret;
- Oli mas kopret (helpem olgeta) wetem ol elktorol ofisa we wok blong olgeta hemi risponsibiliti blong fasin blong eleksen. Oli no mas blokem ol elektorol ofisa long wok blong eleksen;
- Oli mas kopret (helpem olgeta) ol man blong lo olsem polis taem oli givim ol ansa long saed blong wan enkwari o investigesen.

15. Elektorol kampen

Elektorol kampen i gohed long 14 dei. Hemi stat long dei we EC i givim faenel lis blong kandidat. I gat 48 awa "saelens" (taem i kwaet) bifo ol eleksen dei.

Long taem blong kampen, ol pati mo ol kandidat oli wok blong tokbaot long ol vota olsem wanem bae oli wok blong protektem ol intres blong kantri mo sisitisen. Bae oli mas tok long wan wei we ol man bae oli luksave se oli save mekem wok pitim ol narafala kandidat. Fasin blong folem (kod blong kondak) blong EC we oli mekem blong ol kandidat oli save ridim, hemi impoten tumas blong mekem sua se kampen hemi fri mo hemi pisful. Yu mas save se fulap ofens, ol kandidat oli mekem long taem blong kampen.



Hemi impoten tumas se ol man oli karem ol stret infomesen blong mekem ol jois long taem blong eleksen mo blong mekem se fasin blong eleksen i folem wan stret rod. Bae i mas gat, long taem blong kampen, fridom blong toktok, fridom blong tingting, fridom blong miting, fridom blong wokbaot, sikiuriti blong man mo man i gat raet blong karem ol infomesen. Evri man i wok long eleksen i mas rispektem hemia.

Blong mekem se kampen i gud tumas, ol kandidat oli mas toktok gud long saed blong ol wok oli wantem mekem blong mekem sua se ol vota bae oli gat fri jois blong vot.

Ol lo mo regulesen we i stap naoia oli givim long evri sitisen raet blong karem infomesen long saed blong ol man we oli stanap, mo oli mas save se oli mekem jois blong olgeta nomo mo bae ino gat man i traem blong fosem, treten o givim mane o narafala samting long saed blong korapsen.

Lo ino tokbaot samting ia be hemi gud tumas spos ol kandidat oli folem wan fasin blong talemaot saed blong mane, hamas oli karem mo hamas oli spendem long kampen. Samting ia bae i helpem olgeta long saed blong kampen.

Seksen 50 blong RPA i talem:

("I gat sam samting we man ino save mekem long polin dei"):

- (1) Long taem blong vot bae ino mas gat man, long 100 mita long polin stesen: –
 - (a) I traem blong fosem wan man long saed blong vot;
 - (b) I traem blong save ol vota bae oli vot long huia; o
 - (c) Holem wan mitin o mekem wan toktok.



Plan blong kampen blong kandidat

Wan kandidat i save winim eleksen spos hemi folem wan plan. Plan ia bae hemi map blong rod blong hem kasem eleksen dei from gol blong hem, hemi blong winim eleksen. Plan blong kampen bae hemi talem evri smolsmol rod blong folem long taem we hemi disaed blong stanap kasem taem vot i klos long eleksen dei.

Ol stamba blong plan blong kampen:

1. Mas luksave ol problem mo gat ol gol: stamba blong kampen hemi ol problem we kandidat i luksave mo wanem plan blong hem blong feksemap.
2. Karem ol infomesen: infomesen bae i helpem blong luksave gud ol rod blong kampen. Infomesen ia bae i helpem blong mekem ol toktok blong kampen.
3. Bae yu mas aedentifae (luk save gud) ol grup, ol oposisen mo ol vota mo supota: hemi impoten tumas blong save gud ol grup we toktok blong yu bae i sperem olgeta. Spos yu mekem hemia bae i helpem yu blong mekem ol gudfala toktok.
4. Luksave gud ol alae mo oposisen: long taem blong kampen, hemi taem blong sperem ol man blong mekem se oli vot long yu. Yu mas save namba blong man insaed long wan konstituensi mo huia ol man we oli supotem you mo ol man blong oposisen.
5. Bildim tim blong yu: tim blong kampen i karem long foret blong ol man, imij blong yu. Hemi impoten tumas se yu karem wan strong tim. Bae yu mas karem sam man we yu save trustem olgeta mo ol man ia bae oli save toktok tru long saed blong kampen mo yu mas gat mitin wetem olgeta oltaem.

Kandidet blong wan pati hemi mas save gud ol fasin blong wok blong pati blong mekem se kampen i stanap gud.



Tanem gud kampen mesej blong yu

1. **Yu mas aedentifae (luk save gud) ol problem:** toktok fastaem long ol vota blong konstituensi mo luksave ol problem blong olgeta.
2. Faenem ol fasin blong feksemap **ol problem** blong vota.
3. **Gavman i mekem wanem long saed ia?**
4. **Tingbaot long wan mesej** i tokbaot ol wori mo problem blong ol vota mo tokbaot fasin blong yu blong feksemap (spos oli elektem yu)

Toktok long foret blong ol man

Toktok long foret long ol man hemi wan impoten pat blong kampen. Bes wei blong mekem se i kam gud hemi praktis, praktis mo praktis.

Ol advaes:

1. Yu tokto slo mo klia;
2. Yu stap long subjek blong yu (yu no go aotsaed);
3. Mekem se toktok o sot;
4. Jerem ol personol stori mo eksempol;
5. Totktok strong;
6. Lukluk long ae blong ol wanwan vota;
7. Yu relaks mo yu gat konfidens;
8. Bodi blong yu i mas stanap stret;
9. Yu talem ol samting blong laf (be ino tumas);
10. Yu mas save gud subjek blong yu;
11. Ripitim kampen mesej blong yu.

Gudfala fasin:

Stanap stret, lukluk long ae blong ol man – talem gud nem blong yu long wan strong mo klia fasin, pati blong yu mo from wanem yu stanap.

Nogud fasin:

Tajem ol finga blong yu tumas, toktok ino strong, yu stap lukluk daon (long leg blong yu) mo statem toktok blong yu mo talem olsem wanem bae yu winim ol eleksen.



Pat 4: Ajen blong Kandidet mo Pati (ol Representetiv)

Ol ajen blong ol pati mo ol kandidat oli stanap olsem representetiv (ajen) blong olgeta mo oli gat akreditesen (raet) blong VEO.



Ol ripresentetiv (ol ajen) blong ol kandidat mo pati oli impoten tumas long taem blong eleksen. Oli mas watjem gud fasin blong vot mo kaontem, oli mas mekem sua se fasin ia i folem wan stret rod. Ol pati mo ol kandidat oli mas karem fulap ajen blong olgeta blong mekem sua se eleksen fasin i folem wan stret rod.



16.

Wok mo impotens blong ol ajen blong kandidat mo pati

Ol kandidat mo ol politikol pati oli gat raet mo risponsibiliti blong olgeta finis be oli no save kam insaed blong polin stesen long dei blong eleksen. Taswe oli mas apoentem wan man (ripresentativ) we bae hemi ajen blong olgeta bae i stap insaed blong polin stesen long dei blong eleksen, long taem blong vot mo kaontin.

Ol kandidat mo ajen oli gat raet mo otoriti blong ripresentem politikol pati o kandidat. Ol politikol pati mo ol independen kandidat nomo oli save apoentem ol ajen.

Ol ajen oli impoten tumas blong watjem elektorol fasin mo mekem sua se ol raet blong ol kandidat o pati blong olgeta i stap gud. Taem wan politikol pati hemi stanemap wan kandidat, hemi mo isi blong olgeta blong karem ol ajen blong go insaed blong polin stesen. Ol independen kandidat oli mas gat wan ajen blong ripresentem olgeta long taem blong eleksen insaed blong polin stesen.

Wanem i impoten tumas se ol ajen bae oli mas saenem ol pepa insaed blong polin stesen mo oli mas rikodem ol risal blong mekem sua se fasin blong vot i folem gudfala rod.

Hemi impoten tumas se ol ajen oli save gud fasin blong vot mo kaontin mo ol raet mo risponsibiliti blong olgeta. Ol pati mo ol kandidat oli mas mekem trenin long ol ajen blong olgeta bifo eleksen dei blong oli save gud wok blong olgeta.



17.

Akreditesen (raet we EC i givim) blong kandidat mo pati

Stat long elektoral kampen, EC bae i givim wan jans long ol politikol pati mo kandidat blong givimaot nem blong ol ajen blong olgeta (ol ripresentativ) blong oli wajem gud ol vot mo kaotin long eleksen dei, mo givim baj long olgeta.

Taem blong akreditesen (givim raet) bae i stat bifo eleksen dei mo bae i stop 24 awa bifo eleksen dei.

Ol ajen blong pati mo kandidat oli mas karem raet blong olgeta blong wok olsem ajen blong pati o blong kandidat we i stanap long eleksen.

Bifo eleksen dei mo bae i stop 24 awa bifo eleksen, ol kandidat, pati mo independent kandidat oli mas givim nem blong ol ajen blong olgeta.

Ol politikol pati mo kandidat oli save apoentem wan man blong toktok wetem VEO, submitin ol pepa, saenem ol pepa mo mekem ol narafala samting blong karem akreditesen blong pati o kandidat.

Blong karem wan akreditesen blong ajen, ol politikol pati o ol kandidat oli mas givim ol infomesen ia:

- Nem, adres, telefon mo email (spos i gat) blong jeman o kandidat blong pati.
- Nem, adres, telefon mo email (spos i gat) blong man we i save toktok
- Ol kopi blong Fasin blong Folem, we VEO i saenem finis, we oli mekem long ol politikol pati mo ol kandidat .
- Ol pepa we oli rejisterem finis wetem ol legol otoriti
- Nem blong ol ajen we i karem otoriti wetem kod mo namba blong polin stesen bae hemi wok long hem. Bae i gud spos ajen hemi save wok long polin stesen we bae hemi save vot tu. Spos hemi wok long wan polin stesen we ino gat nem blong hem blong vot, bae hemi no save vot.

Wan ajen i save karem otoriti (akreditesen) spos:

- Hemi wan sitisen blong Vanuatu.
- Hemi gat 18 ia finis.
- Hemi rejista finis olsem wan vota.



Spos hemi luk se is tret, PEO bae i givim wan leta blong otoriti mo wan baj long wanwan ajen. Ol pati mo ol kandidat aotsaed Efate, PEO bae i sendem ol baj long ol provins mo ol retenin ofisa bae oli mas raetem insaed blong ol fom. Spos wan man we hemi talem se hemi ajen be hemi no gat leta blong otoriti o baj, presaedin ofisa bae ino letem man ia i stap insaed blong polin stesen. Bae i mas gat wan lis blong ol politikol pati mo blong ol ajen we PEO i apruvum finis, insaed blong ol polin stesen.

Ol ajen oli mas putum baj we VEO i givim long olgeta, oltaem nomo, taem oli stap insaed long polin stesen o narafala ples blong obsevem fasin blong eleksen. Ol ajen oli mas rispektem ol raet blong ol vota, ol obseva mo ol poling/elektorol staf mo oli no mas blokem fasin blong eleksen.



18.

Ol raet mo responsibiliti blong ol kandidat mo ol ajen blong pati

Folem lo, regulesen mo ol ruls, ol politikol pati mo ol independen kandidat oli save gat 2 man nomo insaed blong polin stesen. Wan (1) nomo i save stap insaed blong polin stesen mekem se narawan i mas wet aotsaed afta oli jenj. Ol ajen oli save wok long narafala kandidat mo oli save go long narafala polin stesen

VEO i save givim akreditesen long ol ajen be hemia nomo. Presaedin Ofisa bae i alao wan ajen nomo insaed blong polin stesen, long wan kandidat, long wan taem. Ol ajen oli mas putum ol baj blong olgeta

Ol ajen oli jud putum ol baj blong olgeta o leta we VEO i givim long olgeta, oltaem, mo karem wan foto. Presaedin ofisa i save kanselem baj o leta blong VEO spos ajen o kandidat ino rispektem o folem ruls. Oli mas putum/karem ol baj o leta blong VEO oltaem nomo taem oli go insad blong polin stesen.

Ol ajen blong pati o kandidat oli save stap insaed blong pling stesen taem ol man oli vot mo long taem blong kaontem. Wok blong ol ajen hemi blong watjem gud taem man i vot mo taem oli kaontem, long wan fasin i folem lo. Oli protektem tu kandidat o pati blong olgeta insaed long polin stesen.

Oli no obseva nomo, but oli man we oli mekem sua se vot mo kaontem i folem lo mo mekem sua se oli protekem raet blong ol kandidat o pati blong olgeta.

Oli gat raet blong mekem komen, gat kwestien, putum wan petisen, insaed blong ripot blong presaedin ofisa.

Insaed blong polin stesen, ajen o ol kandidat oli nomo save mekem kampen blong olgeta.



Wan kandidat ajen I save kasem infomesen abaot proses long ol prisaeding ofisa be hemi no mas distebem vot or taem blong kaontem vot. Ajens oli no mas distebem wok long eni wei. Spos oli luk sam fasin we I no stret mo I agensem lo, bae oli letem prisaeding Ofisa I save mo askem blong i stap insaed long poling stesen ripot.



19.

Gudfala fasin we ol kandidat mo ol ajen blong pat oli mas folem

Evri man, ajen o pati we i kasem raet blong stanap long eleksen i mas mekem desisen blong folem ol samting ia:

- mas save gud mo rispektem ol ruls mo regulesen blong fasin blong eleksen ;
- mas save gud fasin blong poling (vot) mo fasin blong kaontem;
- mas sowem leta we i givim raet long hem (leta long otoriti) we i sowem aedentiti blong hem, taem hemi kam insaed long polin stesen, mo presaedin ofisa hemi mas agri long hem fastaem ;
- putum akreditesen baj blong hem oltaem insaed blong polin stesen, we VEO i givim;
- folem oltaem wanem presaedin ofisa i talem taem hemi stap insaed blong polin stesen;
- mas toktok long presaedin ofisa nomo mo semak spos hemi wantem putum wan komplek;
- taelem ol wori blong hem long presaedin ofisa long wan fasin bae ino save blokem vot;
- no save totkok o mekem saen long ol poling staf mo long ol vota insaed long poling stesen;
- no save faenem wan rod long elektorol fasin, long taem blong vot o long taem blong kaontem;
- no save tajem eni pepa insaed long elektorol stesen;
- no save helpem o traem blong helpem ol elektorol ofisa taem oli mekem wok blong olgeta;
- no save yusum ol elektronik samting (olsem telefon) insaed long polin stesen;
- no save tekem ol pikjia long poling stesen;
- mas talem long presaedin ofisa se hemi wantem kamaot long polin stesen long taem blong vot, afta hemi save go;
- Hemi mas gat wan gudfala fasin oltaem nomo wetem rispek long ol man, gudfala judjmen mo gat bigfala save long saed blong profesionol fasin, oltaem nomo.





*Empowered lives.
Resilient nations.*



NEW ZEALAND